

14/06/2001

Misi kemanusiaan ke Iraq berlepas

SEPANG, Rabu - Malaysia hari ini menghantar misi kemanusiaan ke Iraq sebagai sokongan kepada rakyatnya serta usaha menamatkan sekatan ekonomi terhadap negara itu yang dikenakan Pertubuhan Bangsa-Bangsa Bersatu (PBB) sejak lebih 10 tahun lalu.

Misi yang dikenali sebagai "Penerbangan Kemanusiaan Ke Iraq" itu diketuai Menteri Luar, Datuk Seri Syed Hamid Albar.

Ia sebagai susulan kepada misi pertama anjuran Badan Amal dan Kebajikan Isteri Menteri dan Timbalan Menteri (Bakti) yang diketuai isteri Perdana Menteri, Datin Seri Dr Siti Hasmah Mohd Ali, Mac tahun lalu.

Perdana Menteri, Datuk Seri Dr Mahathir Mohamad dan Dr Siti Hasmah, turut menghantar rombongan itu, di Kompleks Bunga Raya, Lapangan Terbang Antarabangsa Kuala Lumpur (KLIA) di sini.

Misi tiga hari kali ini disertai kira-kira 300 rakyat Malaysia termasuk pegawai dan pelajar perubatan, pegawai kanan kerajaan, pengamal media, dan wakil badan bukan kerajaan (NGO).

Antara mereka ialah Ketua Menteri Melaka, Datuk Wira Mohd Ali Rustam; Menteri Besar Perlis, Datuk Seri Shahidan Kassim; dan Pengarang Kumpulan Berita Harian, Datuk Ahmad Rejal Arbee.

Rombongan itu juga membawa bantuan seperti ubat, barang keperluan yang akan diagihkan kepada rakyat Iraq.

Bercakap pada sidang akhbar, Syed Hamid berkata, Malaysia berharap misi itu akan memantapkan sokongan kepada usaha menarik balik sekatan terhadap Iraq yang dikenakan Majlis Keselamatan PBB sejak Perang Teluk lebih 10 tahun lalu.

Syed Hamid berkata, misi kali ini juga diharap dapat mendedahkan rakyat Malaysia, terhadap penderitaan rakyat Iraq selain menyemai semangat kesukarelaan.

Katanya, Malaysia juga akan mempelawa pegawai perubatan Iraq ke negara ini untuk mempelajari perkembangan terbaru dalam dunia perubatan.

Ditanya sama ada negara akan menghantar misi seumpama itu lagi, Syed Hamid berkata, kerajaan akan berusaha melakukannya walaupun langkah itu sukar dan mahal.

Beliau berkata, Malaysia juga perlu mendapatkan kebenaran PBB untuk memastikan negara tidak melanggar sebarang ketetapan badan dunia itu.

"Kita harap banyak lagi penerbangan kemanusiaan seperti itu dapat dilakukan selain berharap penerbangan awam ke Iraq dapat diadakan semula," katanya.

(END)